



**PARLAMENTO
NACIONAL**
República Democrática de Timor-Leste
GABINETE DO PRESIDENTE

Mensagein badak Sua Exa Presidente Parlamento Nacional

Dr Aniceto Longuinhos Guterres Lopes

Iha abertura Seminariu Nasional kona ba Asessibilidade Fiziku iha Dezenvolvimentu Nasional
Laiha Ema ida hela iha Kotuk

Dili -Timor-Plaza, 17 Setembru 2020

Excelentíssimo Senhores

.....

Lori Presidenti Parlamentu Nasional nia naran, ba dala-uluk hau hatoo agradesimentu ba Diretor Ezekutivu Asosiasaun Deficientes Timor-Leste, Senhor Cesário da Silva nia inisiativa ba organiza seminariu ida ne'e no konvida PPN mai partisipa iha eventu ne'e. "La iha ema ida hela iha kotuk", ne'e katak ema hotu-hotu hetan oportunidade hanesan ba sai benefisiadu husi dezenvolvimentu no sai autor ka promotor ba dezenvolvimentu. Ne'e mak esensia ka sentidu principal husi dezenvolvimentu. Husi ema ba ema hotu-hotu no ba natureza nebe benefisia ka hamoris ita gratuitamente.

Iha seminariu ida ne'e ita koalia kona ba asesibilidade fizika iha dezenvolvimentu nasional, relasiona ho maluk sira nebe sofre defisiencia. Obrigasaun moral, konstitusional no legal sira bolu atensaun mai ita hotu atu labele halo diskriminasaun, esklui no impede maluk defisiente sira husi ita nia relasianamentu social, ita nia atividade politika no ekonomika, no iha programas dezenvolvimentu setor hotu-hotu. Maibe vontade no intensaun moral no norma legal sira la too, enkuantu la sustenta ho politika, plano no asaun sira nebe hatudu no lori ita ba implementasaun konkreta nebe fo benefisiu ba maluk sira nebe moris iha kondisaun defisiente.

Iha seminariu ida ne'e hau enkoraja partisipante sira atu hanoin hamutuk no diskuti kona ba dezenvolvimentu infraestrurua fizika nebe favorese sidadaun defisiente sira. Dala barak ita eziji makas liu ba Governu ka ba setor privadu sira atu halo dezenvolvimentu infraestruturas fizika

nebe sai facilidade publika tenki iha asesibilidade ba sidadaun defisiente sira. Nee responsabilidade nebe Estadu tenki halao duni maibe, la too. Sidadaun defisiente sira mos moris iha komunidade nia leet. Signifika konstrusaun privadu nebe iniciativa ema ida-idak nian mos presiza iha kondisoens asesibilidade hanesan. Iha biban ida ne'e Prezidente Parlamentu Nasional husu atu tau hamutuk hanoin no diskuti mos kona ba possibilidade estabelese padraun geral ba kualker konstrusaun infraestrutura privadu, nebe mai husi sidadaun ida-idak mos tenki iha kondisoens asesibilidade fizika ba portador defisiensia sira. Karik iha ona padraun ruma, oinsa mak asegura kumprimentu padraun ne'e husi sidadaun sira. Projetus PNDS mos tenki tau atensaun ba programas ka projetus suku nian iha kontekstu ka tuir kriteriu asesibilidade ba defisiente sira.

Parlamentu Nasional liu husi Komissaun F bele halo fiskalizasaun hodi asegura kumprimentu padraun asesibilidade publiku espesial iha dezenvolvimentu infraestruturas nivel Suku. Parlamentu Nasional mos bele halo fiskalizasaun liu husi unidade parlamentar kompetente ba politika no normas nebe orienta asesibilidade iha dezenvolvimentu infraestrutura fiziku sira.

Ho hanoin hirak ne'e hau deklara abertura no deseja diskusaun diak no susesu ba seminariu ida ne'e.

Obrigadu barak,